

四庫全書

史部

欽定四庫全書

史部

續資治通鑑長編卷六十一至四

詳校官檢討臣劉錫五

刑部郎中臣許兆椿覆勘

纂修官編修臣楊壽楠

謄錄貢生臣張大同

謄錄貢生臣苗序瀛

欽定四庫全書

續資治通鑑長編卷六十一

宋 李燾 撰

真宗

景德二年八月丁丑朔以翰林學士李宗諤左諫議大夫張秉同判太常寺仍命內臣監修樂器時殿中侍御史艾仲孺上言每監祠祭伏見太常樂器損闕音律不調郊禋在近望遣使修飾及擇近臣判寺故以命宗諤

等宗諤素曉音律乃令太樂鼓吹兩署工較其優劣黜去濫吹者五十餘人宗諤因編錄律呂法度樂物名數目曰樂纂又裁定兩署工人試補條式及肄習程課皆施行之

戊寅羣臣復上表請郊畢聽樂如故宰相繼以面請卒不許

庚辰永興鳳翔節度使太傅兼中書令雍王元份薨贈太師尚書令追封鄆王謚恭靖上於元份友愛尤篤元

份寢疾上時在澶淵聞之甚憂就遣太醫中使旁午於路及還京屢自臨省醫禱俱至元份母任氏早卒特贈太儀以慰其心既薨哭之甚哀他日見宰相語及再三雪涕舊制親王母為太妃公主母為太儀時不欲有妃號故特贈太儀

辛巳詔諸州縣案帳要切文書鈔榜等委官吏上籍收鎖無得貨鬻毀棄仍命轉運使察舉違者重寘其罪時衛州判官王象坐鬻案籍文鈔除名為民配隸唐州因

著條約

癸未令諸路轉運使不得以京朝官使臣隨行指使

三司言利州轉運司稱閬州素出斃器請約所售價收其筭不許

丙戌西川轉運使黃觀言益州將吏民庶舉留知州張詠詔褒之始車駕北征四方搖心詠慮遠夷乘隙為變欲出奇以勝之因取盜賊之尤無狀者磔死於市衆皆懾服遂底嘉靖每訊牒便文久不得判詠率爾署決莫

不允當蜀中喜事者論次其詞總為誠民集鏤板傳布
上嘗遣使巡撫西川因令諭旨曰得卿在彼朕無西顧

之憂也

詔以劉承珪新定權衡法附編敕

實錄會要皆云詔以

承珪所定權衡法附編敕而不頒下集承珪新式自淳
化三年已行用矣不知此所謂不頒下者果何法也會
要云景德中承珪重加參定其法益為精備所謂不頒
下者豈此法耶其實與淳化所用不殊當是已行用故
不復頒下而承珪新式
及是始附編敕耳當考

丁亥翰林學士右諫議大夫晁迥責授左司郎中依前
充職初迥與給事中馮起等五人並為鄆王元份留守

官屬王以獄逸囚驚悸得疾遂死迥等坐輔導無狀并及於責

戊子詔咸平編敕後續降宣敕所在編錄二本一長吏主之一法司行用轉運使檢察無漏落 命河北轉運使劉綜提點雄州榷場孔揆等與諸州軍長吏共平榷場物價以和好之始務立永制也

己丑令三司抽筭商旅茶許民就西京白波鞏縣及緣河倉入粟博買從殿中丞京兆周實之請也

庚寅令益梓利夔諸州管內鎮將不得捕鄉村盜賊受
詞訟 全椒縣主簿知縣事王獻為歙縣令獻在全椒
有清政轉運及使者連薦其能故移宰劇邑 免秦州
所逋博糴軍糧八千六百九十餘石 通判鳳翔府王
為寶請於興元府置榷茶務上以擾民不許

上之駐蹕澶淵也樞密使陳堯叟慮敵騎侵軼建議令
緣河悉撤橋梁毀船舫稽緩者論以軍法河陽河中陝
府皆被詔監察御史王濟時知河中獨持其詔不下曰

陝西有關防隅礙舳艫連屬軍儲數萬奈何一旦沈之
且動搖民心因密疏奏寢其事上深嘉嘆遣使褒諭甲

午詔拜工部員外郎兼侍御史知雜事賜金紫

記聞載王濟事

又云陝州通判張績時以公事在外州中已撤浮橋績聞河中不撤乃復修之冠準由是知此二人績亦以此為三司判官轉運使按是年十二月丙申實錄書賜殿中丞通判滄州張績緋留權三司鹽鐵判官明年三月庚戌人書殿中丞張績為度支判官記聞稱陝州通判實錄乃稱滄州通判不知何故當考或附九月壬戌日

初鄆王元份娶崇儀使李漢贊之女性悍妬慘酷宮中
女使小不如意必加鞭挾或有死者上每有恩賜詔令

均給本宮而李盡取之罕所需及元份既卧疾上親臨
問見左右無人供侍因輟宮人為主湯劑女使因笞撻
廢疾一日因謀燔藝衆救之而止始太宗上僊戚里皆
赴宮中朝晡臨惟李多稱疾不至上不欲遂成其惡特
於殿隅別設幄帟屢召始入又元份生日李以衣服器
用為壽皆飾以龍鳳元份薨李無戚容而有謗上之語
上既盡知其所為以元份故為優容之及是復不欲顯
究其罪狀乙未命削國封置之別所

丙申樞密直學士兵部郎中邊肅知宣州坐與趙諫往還故也

先是大理寺斷禁軍逃亡在赦限內捉獲者斬赦限外即准律減等上曰此刑名殊非允當令赦限內不首者重去赦遠不首者輕乃詔詳議己亥詔亡命軍士及劫盜赦限內捕得罪至死者奏裁限外劫盜準法亡命軍士罪至死者杖脊黥面流沙門島情理重者奏裁罪不至死者不以赦限內外並依常法

庚子詔應賊盜贓物自今委長吏通判官親付本主處
為下吏所罔致斷獄失實也 詔府州蕃漢雜處號為
難治宜令審官院銓司擇其通判錄事參軍

癸卯除戎州突儒渡錢

甲辰三司請令京東以稅輸送河北諸州京西轉運使
請於部內配糴芻糧皆不許 河北轉運使劉綜請擇
文學器識之士通判緣邊州軍使其商度邊事及往還
北境文牒從之 有星孛于紫微 太常博士馮璉知

光州璉前為廣南轉運使規畫乖當故責之

乙巳徙兩浙轉運使陳象輿知饒州坐與趙諫往還故也
詔河南州軍所管鄉縣在河北者今年秋租許就
便于德棣州輸送
詔涇原儀渭等州蕃部所給馬價
茶緣路免其筭

九月丙午朔屯田員外郎陳奕兼武信軍節度掌書記
賜緋時安定郡公惟吉節度武信闕掌書記上謂宰相
曰惟吉知書當於朝臣中擇有詞學廉謹者為之審官

院以奕名聞上令中書延見之畢士安等言奕如所舉乃召對便殿而有是命

丁未上以趙德明誓約未定即命向敏中自知永興軍府改為廊延都部署兼知延州使經畧之上封者言郊丘

神位神板皆有司臨事題署多不嚴肅詔鹵簿使王欽若改造欽若言五方帝位板如靈威仰赤熛怒皆是帝名理當恭避望下禮官檢定禮官言按開寶通禮義纂靈威仰赤熛怒含樞紐白招拒叶光紀者皆五帝之號漢書注五

帝自有名即靈符文祖之類也既為美稱不煩迴避詔可
欽若又言壇圖神位升降未便漢書郊祀志五帝為天神
之佐今五帝在第一龕天皇大帝在第二龕與六甲嶽瀆
之類同處北極衆星所拱今與尚書大理之類接席帝坐
為天市之尊今與二十八宿積薪騰蛇杵臼之類同在第
三龕卑主尊臣甚未便也若以北極帝坐本非天帝蓋是
天帝所居則北極在第二帝坐在第三亦高下未等又太
微之次少左右執法子星之次少孫星天輶當為天福天

記當為天紀望令司天監衆官參驗聞奏詔欽若與禮儀使太常禮院司天監同檢討詳定欽若言本因臣所陳情不可復同商榷許之既而禮儀使趙安仁等言得崇文院檢討杜鎬陳彭年狀按開寶通禮元氣廣大則稱昊天據遠視之蒼然則稱蒼天人之所尊莫過於帝託之於天故稱上帝天皇大帝即北辰耀魄寶也自是星中之尊易曰日月麗乎天百穀草木麗乎地又曰在天成象在地成形是明辰象非天草木非地則是天以蒼昊為體不入星辰

之列又郊祀錄壇之第二等祀天皇帝北斗天一太一
紫微五帝坐並差在行位前餘內官諸位及五星十二辰
河漢都四十九坐齊列俱在十二陛之間唐建中元年司
天冬官正郭獻之奏天皇帝北極天一太一准天寶中敕並
合升在第一等從之貞元二年親郊令禮官詳定太常卿
漢中郡王瑀與博士柳冕等奏開元定禮垂之不刊天寶
改作起自權制皆方士謬妄之說非典禮之文請依禮為
定詔復從開元禮仍為定制郊祀錄又云壇之第三等有

中官市垣帝坐等十七坐並在前開元禮義羅云帝坐
有五一在紫微宮一在大角一在太微宮一在心一在
天市垣即帝坐者非直指天帝也又得判司天監史序
狀天皇大帝一星在紫微勾陳中其神曰耀魄寶即天
皇是星五帝乃天帝也北極五星在紫微垣內居中一
星曰北辰第一主月為太子第二主日為帝王第三為
庶子第四為嫡子第五為天之樞蓋北辰所主非一又
非帝坐之比太微垣十星有左右執法上將次將之名

不可備陳故名太微垣星經舊載孫星而壇圖止有子
星辯其尊卑不可同位天輶主鑒輿輦較不當作福字
天記一星在午堦第四龕別有天紀九星在寅堦第三
龕壇圖並載不當合而為一竊惟壇圖舊定悉有明據
天紳定位難以躋升望依星經悉以舊禮為定詔從安
仁等議欽若復上言舊史天文志並云北極北辰最尊
者又勾陳口中一星曰天皇大帝又鄭元注周禮謂禮
天者冬至祭天皇於北極也後魏孝文裡六宗亦升天

皇列五帝之上此皆良史鴻儒所述豈皆方士謬妄耶
古禮舊制未必全是至如九宮貴神天寶立祀在宗廟
之上文宗初舒元輿輒率鄙見降為中祀厥後水旱作
沴元輿果以覆族往者陛下特頒明詔立為大祀靈心
合荅景福並臻今若以方士為妄即九宮之祀可廢乎
至若天市帝坐雖前代未有異論按晉書天文志帝坐
光而潤天子吉威令行既名帝坐則為天子所占列于
下位未見其可又安仁所議以子孫二星不可同位陛

下方洽高禋之慶以廣維城之基苟因前代闕文便為得禮實恐聖朝茂典尤未適中豈可信貞元之末學輕談略經史之羣儒譎論除執法天輶天記三星安仁已有典據今請如舊其天星北極帝坐孫星四坐臣已新製板位恭俟宸旨詔天皇北極特升在第一龕又設孫星位于子星之次帝坐如故欽若復言帝坐止三在紫微太微者已列第二等惟天市一坐在第三等此人情所未安也又晉志大角及心中星但云天王坐實與帝

坐不類詔特升在第二龕 詔州縣官在任廉幹許州

佐職官保奏其幕府官亦許知州通判奏舉皆令本路
轉運使考察連坐上聞異時不如狀一等寘罪在任不
法亦如之 河北轉運使劉綜請令近臣連坐於幕職

州縣官內舉堪任京官知縣官各一員俾知天雄軍相
州管內劇縣上曰河朔宰字尤藉得人然慮舉官或致
稽滯當俟銓司引對常選人察其有績効無罪累者朕
自擇之

會要係
九月事

邛部川百蠻都王阿道遣王子將軍

百九十二人來貢方物詔授阿道安遠將軍阿道叔懷
化將軍阿宥為歸德將軍遊奕將軍離歸為懷化將軍
大判官懷化司候任彥德王子將軍部的並為懷化郎
將判官任惟慶為懷化司候

阿道為安遠將軍實錄會
要並在明年正月今并書

之

詔興州青泥路依舊置驛其新開白水路亦任商
旅往來

庚戌以淮南旱歉詔轉運使疏理管內繫囚

辛亥詔諸司入流官選滿堂除資叙超異多違舊式自

今並從銓曹投牒注擬准敕格施行 除三泉縣東西
及青烏嘉陵西津渡年額錢仍不得以部民為渡子
壬子詔自今宴會宜令御史臺預定位次告示各務端
肅無得喧譁違者殿上委大夫中丞朶殿委知雜御史
廊下委左右巡察視彈奏

癸丑趙德明始遣其都知兵馬使白文壽來貢

甲寅免雍王府記室參軍兵部郎中楊澈削兩任祠部
郎中朱協削一任以其輔導無狀藩邸左右人或踰矩

未嘗聞達於主故也於是協兄昂致仕踰五年矣尚無

恙乃以書招協協亦告老而歸兄弟皆眉壽時人比之

漢二疏焉

本傳因昂致仕即載其以書招協不知事相去乃五年後也今改之

京西轉

運使鄭文寶請自京給大方茶晉絳州布依河東例博
市軍儲知河南府溫仲舒請等第配糴上以其擾民弗
許所須儲蓄令三司經畫以聞 詔舉放息錢以利為
本偽立借貸文約者從不應為重科罪

乙卯以戶部判官屯田員外郎崔昈為都官員外郎曹

國公府記室參軍賜金紫先是上謂輔臣曰元儼年少尤資贊導翊善戚維迂懦循默不能規戒崔昺性頗純謹以之代維庶有裨益因召對而命之昺頌子也

丁巳除越州天章寺田租

戊午光祿寺丞錢易言竊覩文德殿常朝兩班不及三四十人前秋以朝官奉使者多權借館閣官常朝蓋以凡掌職務止赴五日起居頗違舊章望令並赴常參詔應三館秘閣尚書省二十四司諸司寺監朝臣除內殿

起居外並赴文德殿常參其審刑院大理寺臺直官開
封府判官司錄兩縣令司天監翰林天文官監倉場權
務等仍舊免常參易嘗通判蘄州奏疏言堯放四罪而
不言殺彼四者之凶尚惡言殺非堯仁之至乎蓋國之
所謹莫先乎刑刑不可不本於法不本於法則刑黷而
致暴刑黷而致暴則下無所措手足矣古之肉刑者剕
劓黥刖皆非死罪尚以為虐而絕之近代以來非法之
刑斷截手足鉤背烙身見白骨而口眼猶動四體分落

而呻痛未息以此示人故四方長吏益殘暴不已又婺
州先斷賊手足然後斬之以聞壽州巡檢使以賊磔於
闌闌之中其旁猶有盜物者使嚴刑可戒於衆則秦天
下無一黔首之亂矣臣以謂非法之刑非所以助治也
惟陛下除之上嘉納其言 禁福建諸州軍寺院童行
依僧尼真影出家者 判刑部填從吉言目今遇有赦
文頒下請差三司館閣官告院吏筆札精熟者書寫每
本著其姓名集審刑詳議大理詳斷官校讀錯誤者罪

之仍請令中使監蒞詔可

國家三年一修郊禮必有肆赦冠裳公嘗議模印以頒四

方為衆所沮而止其後外郎覆奏赦書字誤沂公始舉冠相之議令刑部鑄宿雕字人模印頒行因之日官乞每年頒歷日亦雕板印行舊每歲募書寫人所費三千每模印則三十千仍有沮議曰一本誤則千百本誤沂公語之曰不令一字有誤可矣自爾遵行不改此據王皞百一編當附王曾當國時

辛酉太常寺請自今四時遣太祝奉禮郎二員徧巡行四郊諸壇齋宮有隳損則報寺整葺判寺官春秋躬視從之

壬戌遣太子中允張績乘傳詣解州鹽池致祭時轉運

司言夏秋霖雨有妨種鹽故老相傳唐朝每遇水災必遣使告祭乃不為害故上特親署祝文往禱

張績未見九月甲午

注可考

癸亥權三司使丁謂等上三司新編敕十五卷詔雕印頒行之有賀蘭棲真者不知何許人為道士自言百餘歲善服氣不憚寒暑徃徃不食或時縱酒遊市鄽間能啖腐肉至數斤始至嵩山紫虛觀後徙濟源奉仙觀張齊賢與之善於是上遣中使齋詔召赴闕及至作二

韻詩賜之號宗元大師賚以紫服白金茶帛香藥蠲觀之田租度其侍者未幾求還舊居後五年卒時大雪經三日頂猶熱人多異之

丙寅詔許河中府民齋鐵器過河於近郡貨鬻其緣邊仍舊禁斷以西京左藏庫使獎州刺史趙延信為滁州刺史延信有舊於宣祖歷事三朝以勤幹稱時出知和州占謝之際特有是拜

延信未見

丁卯令資政殿學士王欽若知制誥楊億修歷代君臣

事迹欽若請以直秘閣錢惟演等十人同編修初令惟演等各撰篇目送欽若暨億參詳欽若等又自撰集上進詔用欽若等所撰為定有未盡者奉旨增之又令宮苑使勝州刺史勾當皇城司劉承珪內侍高品監三館秘閣圖書劉崇超典掌其事編修官非內殿起居當赴常叅者免之非帶職不當給實俸者特給之其供帳飲饌皆異於常等

始孟氏據蜀徙夔州於東山以拒王師而居民弗便轉

運使薛顏奏為復其故城又募民墾施黔等州荒田戊辰顏奏今歲獲粟萬餘石

己巳以戶部判官李含章監朗州酒稅含章徇公潔已而臨事褊執羣吏以簿書稽滯為訟推劾得實羣吏決杖而含章亦贖金仍釐務焉

辛未遣中使齎詔撫問種放於嵩山 上閱開封府囚帳日繫二百餘人憫其苛留命給事中董儼直昭文館韓國華與知府張雍慮問情輕者即決之事須證佐者

促成之

壬申詔荆湖溪洞民為蠻人所掠而歸者勿限年月給還舊產

癸酉羣臣三上表請加尊號曰崇文廣武應乾尊道聖明仁孝不允 詔吏部銓常選人有疾者已經引對即依合入資叙注擬未引對者留合入員闕竢痊捐施行徙刑部侍郎知天雄軍府趙昌言知鎮州洺州團練使知鎮州上官正改知潞州正累表納祿弗許又懇求

小郡讓公費上念其勞舊皆不允於是授以近藩焉

乙亥詔廣南西路州軍有縱火焚人廬舍情理兇蠹者依法決訖刺配五百里外牢城從太子中允盧幹之請

也

盧幹未見

十月丙子朔屯田員外郎權判三司勾院杜夢誼侍禁閣門祇候康宗元接伴契丹賀承天節使仍回日充送

伴

事已見五月未此或可前

己卯詔緣河官吏雖秩滿須水落受代知州通判每月

一巡堤縣令佐官迭巡轉運使勿委以他職又申嚴盜

伐河上榆柳之禁

本志並著此事於咸平三年蓋誤也今從實錄但無知通巡堤及申禁伐

木二事今從本志并書之

先是詔權三司使丁謂取戶稅條目及臣民所陳農田

利害編為書謂乃與戶部副使崔端鹽鐵判官張若谷

度支判官崔曙樂黃目戶部判官王曾叅議刪定成景

德農田敕五卷庚辰上之令雕印頒行民間咸以為便

行農田敕民間便之據稽古錄當考其詳崔曙未見

先是潭州攸縣令扈維翰

坐弛慢轉運使劾奏衝替至是用元日赦書例獲引對
有司言當復為令錄上親閱課狀覩其昏耄乃授鄧州
長史

乙酉吏部侍郎平章事畢士安早朝至崇政殿廬疾暴
作上聞之亟遣使撫問還奏疾甚上即步出臨視已不
能言詔太醫診脉內侍竇神寶以肩輿送歸第而卒車
駕即臨哭謂寇準等曰士安善人也事朕於南府東宮
以至輔相飭躬畏謹有古人之風遽此淪沒深可悼惜

詔贈太傅中書令謚文簡錄其子孫中使護喪事給鹵簿葬

丙戌遣度支判官太常博士周漸為契丹國主生辰使侍禁閣門祇候郭盛副之職方郎中直昭文館韓國華為契丹國母正旦使衣庫副使燕通事舍人焦守節副

之尹洙誌國華墓云上令周漸張若谷凡事當問國華恐飾說今不取鹽鐵判官秘書丞

張若谷為國主正旦使內殿崇班閣門祇候郭允恭副之自是歲以為常漸寔兄允恭從孫也凡契丹主生日

朝廷所遺金酒食茶器三十七件衣五襲金玉帶二條
烏皮白皮鞋二量紅牙笙笛觥栗拍板鞍勒馬二匹纓
複鞭副之金花銀器三十件銀器三十件錦綺透背雜
色羅紗綾縠絹二千匹雜綵二千匹法酒三十壺的乳
茶十斤岳麓茶五斤鹽蜜果三十罐花果三十籠其母
生日約此數焉正旦則遺以金花銀器各二十件雜色
羅紗綾縠絹二千匹雜綵二千匹 詔京東水災罷州
縣不急之務 駙馬都尉石保吉不時請對言僕人張

居簡掌私財有所侵盜願賜重責上曰自有常典豈可
以卿故法外加刑保吉又請於私第決罰亦不許保吉
好治生射利尤吝嗇居常命僕人買針縷脂澤櫛沐猥
細雜物置肆第中家人有所須則令就市之冀緣錢不
出於外其鄙近如此

戊子詔東京畿內和買芻藁比市價已令優給宜更增
之詔嶽瀆廟宇自今所屬知州通判每季一徃案行
有隳損者即時修葺

庚寅以宮苑使劉承珪龍圖閣待制戚綸都大提舉諸司庫務時議者言輦下庫務其數踰百三十出納或致因循三司簿領繁多不能案視故特置此職掌舉察京城儲蓄受給監生能否及覆驗所受三司計度移用之事焉

知審刑院查道權判大理寺尹玘權大理少卿

傳珪審刑院詳議官梁象等四人贖金有差大理寺詳

斷官仇象先等六人並削官一任坐議獄不當為外郡

覆奏抵罪也

傳珪梁象仇象先未見

詔承天節羣臣所奏僧道

紫衣師號自今具行業保任以聞時所薦多濫故也

癸巳詔中外羣臣郊裡及承天節非親的族屬不得奏薦
虔州雜料場茶園率民採摘頗煩擾詔罷之

甲午使臣自雄州入奏言榷場商旅貿易於北境契丹
國主弟曰隆慶者受其饋獻必還其直又設酒饌犒勞
之且言今與中朝結好事同一家道路永無虞矣上諭
輔臣曰蕃戎之情茲亦可見然更宜慎擇疆吏謹守詔
條也王旦曰孫僅嘗言國主氣濁而體肥隆慶瘦而剛

果國人多歸之隆慶見本朝歲有贈遺屢勸行賞國中其志欲激動衆心也

丙申詔自今盜賊黥面配牢城者並於千里之外從大理評事林陶所請也

丁酉以故唐龍鎮將來懷順子閏喜補三班奉職來遵子守信補借職仍詔俟閏喜年長即令代父任且命其叔父懷正權主鎮事先是詔南郊壇行事官勿用老疾幼弱者秘書省正字晏殊上章願觀大禮上憐其意

許之因詔京官年未及十五願赴南郊陪位者聽

十一月乙巳朔鹵簿使王欽若奉神位板對于便殿壇上四位塗以朱漆金字自餘皆黑漆第一等金字第二等黃字第三等以降朱字悉貯以漆桺覆以黃縑帔上降堦觀之即付有司仍戒各謹其事禮儀使趙安仁上新定壇圖且言舊圖五帝五嶽中鎮河漢並在第三等檢詳儀注合在第二等望悉刊正奏可 詔從祀行事官賜胙大禮使至太常寺卿十六段用羊犢使相至知

雜御史五十二段用羊豕 王欽若上鹵簿記三卷詔

付史館

丙午河陽節度使王顯來朝請許趙德明稱藩不須納

質但加錫以綏懷之又請通青鹽以濟邊民之用

顯此議恐

不因來朝時姑附于此更考之

詔河北州軍百姓糴穀入官所給價

錢出城門者勿禁

戊申命翰林侍讀學士邢昺戶部侍郎張雍龍圖閣待

制杜鎬諸王府侍講孫奭於京朝幕府州縣官中薦儒

術該博士行端良堪充學官者十人以聞翰林學士
李宗諤東上閣門使忠州刺史曹利用在京接伴契丹
賀承天節使

辛亥詔光祿寺自今宗廟大饗朔望薦獻並令供御庖
人造食務極精潔

丙辰饗太廟

丁巳合祭天地于圜丘大赦上自散齋即進蔬茹禮畢
御樓始飲酒焉

辛酉詔郊祀事有闕誤不恭者無得以赦原罪

癸亥兵部侍郎平章事寇準加中書侍郎兼工部尚書
楚王元佐加檢校太師右衛上將軍彭城郡王元偓為
靜難彰化節度使進封寧王安定郡王元偁為宣德保
寧節度使進封舒王曹國公元儼進封廣陵郡王武信
節度使安定郡王惟吉加同平章事樞密使檢校太保
王繼英加檢校太傅兵部侍郎參知政事王旦為尚書
左丞工部侍郎參知政事馮拯簽書樞密院事陳堯叟

並為刑部侍郎自餘羣臣各以序進秩或加階勲爵邑有差

乙丑命羣牧判官著作佐郎王曙假開封府推官吏部郎中俟契丹使至日持知府張雍書禮迎勞于郊

是歲江浙大穰穀價尤賤舳舻銜尾入湊京都會汴水乾淺故輦下糧斛湧貴丙寅令減價糶官米以濟民戊辰以內殿崇班閤門祇候錢昭晟為崇儀副使是春昭晟計畫減修黃河工料歲終無餘故賞之

已巳命屯田員外郎判三司勾院杜夢誼假檢校秘書
少監開府少尹餞契丹使於上德橋自後皆以府判官
假少尹為餞送推官假判官郎中為接迓不復命他官

五月末所書

總例可考

庚午河東轉運使鮑中和上言嵐州合河津歲收渡錢
二百八十餘貫自廢濁輪寨商旅止由保德沙谷大堡
等津請依合河渡收課詔合河沙谷大堡等津並勿收
渡錢

癸酉契丹國母遣使左金吾衛上將軍耶律留寧副使
崇祿卿劉經國主遣使左武衛上將軍耶律烏延副使
衛尉卿張肅來賀承天節對於崇德殿留寧等將見館
伴使李宗諤引令式不許佩刀至上閣門留寧等欣然
解之上聞之曰戎人佩刀是其常禮不須禁以令式即
傳詔聽自便留寧等感悅謂宗諤曰聖人推心置人腹
中是以示信遐邇也又舊制舍利從人惟上等入見自
餘拜於殿門之外上悉許令入見節日上壽班在諸王

將軍之下大將軍之上

十二月乙亥朔命知雜御史王濟與三司催欠司除放逋負

丙子承天節羣臣上壽於崇德殿舊制中書門下樞密院文武百僚內職既上壽詣大相國寺行香設會於資聖閣至是樞密使而下前一日罷道場赴會是日樞密與學士三司使副復集遂以為常

己卯召輔臣於龍圖閣觀契丹禮物及祖宗朝所獻者

自後使至必以綺帛分賜中書樞密院果實脯腊賜近
臣三館凡承天節獻刻絲花羅御樣透背御衣七襲或
五襲七件紫青貂鼠氍毹披或銀鼠鵝項鴨頭納子塗金
銀裝箱金龍水晶帶銀押副之錦緣皂皴皮鞞金玦束
皂白熟皮鞞鞵細錦透背清平內製樣合線縷機綾共
三百匹塗金銀龍鳳鞍勒紅羅押金線繡方鞵二具白
楮皮黑銀鞍勒氍毹二具綠褐楮皮鞍勒海豹皮鞵二
具白楮皮裏筋鞭二條紅羅金銀線繡雲龍紅錦器仗

一副黃樺皮纏楮皮弓一紅錦袋皂鵬翎獬角髀頭箭
十青黃鵬翎箭十八法漬法麴麴酒二十壺蜜曬山
果十棟檣挽蜜漬山果十棟檣帕克哩山梨柿四棟檣榛
栗松子郁李黑郁李子麴棗拐梨棠梨二十箱麴杭麋
梨粃十椀蕪荑白鹽十椀青鹽十箱牛羊野豬魚鹿腊
二十二箱御馬六疋散馬二百疋其正旦御衣三襲鞍
勒馬二疋散馬一百疋其母又致御衣綴珠貂裘細錦
刻絲透背合線御綾羅綺紗縠御樣果實雜粃腊肉凡

百品水晶鞍勒新羅酒青白鹽國主或致戎器鑲鐵刀
鷲禽曰海東青之類承天節又遣庖人持本國異味前
一日就禁中造食以進御云 禮部貢院言昨詳進士
所納公卷多假借他人文字或用舊卷裝飾重行或為
傭書人易換文本是致考校無準請自今並令舉人親
自投納仍於試紙前親書家狀如將來程試與公卷全
異及所試文字與家狀書體不同並駁放之或假用他
人文字辯認彰露即依例扶出永不得赴舉其知舉官

亦望先一月差入貢院考較公卷分為等第如事業殊異者至日更精加試驗所冀抱藝者不失搜羅躁進者難施偽濫又言尚書周易學究近年并為一科欲請試本經日每十道義二經各問五道仍雜問疏義五道經注五道以為定式向來明法止試六場今請依尚書例試七場第一場第二場試律第三場試令第四場第五場試小經第六場試令第七場試律仍於試律日雜問疏義五道三禮三傳經業稍大難為精熟請每十道義

中間經注六道疏義四道以六通及疏通二經注通三
為合格詔翰林學士邢昺與國子監官同議可否昺等
言尚書周易學究明法經籍不多望各問疏義六道經
注四道六通者為合格其三禮三傳請如貢院所奏並
從之

貢院十二月己卯所言頗與八月丙
子相重本志既兩載之今亦從本志

辛巳以刑部侍郎資政殿學士王欽若為兵部侍郎資
政殿大學士班在文明殿學士之下翰林學士承旨之
上上初見欽若班在翰林學士李宗諤下怪之以問左

右左右以故事對欽若因訴上曰臣前自翰林學士為
參知政事無罪而罷其班乃下故官一等是貶也上悟
即日改焉資政殿置大學士自此始欽若善迎人主意
上望見輒喜每拜一官中謝日輒問曰除此官且可意
否其寵遇如此欽若以四月癸卯除資政殿學士後兩
日即有詔序位在翰林學士之下及今
始升改焉或云欽若既除資政自
許恐誤蓋因上顧問乃進說耳

癸未殿前都指揮使彰信節度使高瓊為忠武節度使
馬軍都指揮使感德節度使葛霸為昭德節度使並解

軍職老疾故也先是霸權步軍司事會在疾告令瓊兼領二司瓊從容言曰臣衰老儻又有犬馬之疾則是一將總此三職臣事先朝時侍衛都虞候以上常至十員職位相亞易於遷改且使軍伍熟其名望邊藩緩急亦可選用上甚然之嘗料簡兵卒諸班直十年者出補軍校年耆者退為本班剩員瓊曰此非激勸之道宿衛豈不勞乎自是八年者皆得叙補焉上聞有司給諸班糧米麤惡不與原樣同諭權殿前都虞候劉謙令各赴

倉換之諸班指揮使皆言米雖陳次然已多費用願不復換乃詔諸班各特賜米一斛倉司官吏抵罪有差謙前以馬軍都虞候潯州防禦使權令殿前都虞候既逾年意望即真而樞密都承旨亳州團練使曹璨自鎮定高陽三路行營都鈐轄就拜殿前都虞候康州防禦使謙慨嘆形於顏色至是擢謙為殿前副都指揮使徙璨為馬軍副都指揮使謙領振武節度璨領天德節度馬先是南作坊使昭州團練使同勾當皇城司張耆坐

與趙諫交遊受其金為人求薦於禮部責授供備庫使
潞州兵馬都監者請置對不許居三月事辨復歸故官
上以耆前任并代鈐轄累上邊事一日召至宣和門閣
中問太原險固耆既陳山川形勝因言雲應蔚朔四郡
間遣人持文移至代州非覘邊虛實即欲習知道里宜
盡窒諸間道獨留土石谷土塏路以示設險上然之於
是擢拜馬軍都虞候英州防禦使 詔武衛大將軍富
州刺史李琪特與假養疾仍舊給月俸琪年八十餘去

歲以老疾不任朝謁表乞五日一赴內殿起居詔可之
俄為御史所劾令奉朝參至是再表請如前詔上憫而
許焉

乙酉河東轉運使鮑中和上奏河北河東陝西路供給
邊備其知州通判幕職州縣官望令審官院吏部銓選
年六十以下彊幹者充從之

丙戌詔三班使臣知縣者給縣令俸其兼兵馬監押者
本官俸外添給如例

壬辰詔西北緣邊長吏不得舉官為通判幕職巡檢從
河北轉運使劉綜之請也 免辰州沅陵縣民歲輸楠
木

甲午右諫議大夫种放自嵩山來朝對於龍圖閣

乙未命虞部員外郎權鹽鐵判官馮亮太常丞直史館
陳堯佐內殿崇班閤門祇候高繼忠侍其振分詣開封
府界提點刑獄錢帛繼忠瓊之子也嘗因對言開封府
司錄王簡遣人畿縣督事因緣乞取未審何人論薦得

為京秩上笑曰簡無人論薦朕以其嘗勅盛梁獄故有此授繼忠曰臣不識此人亦非受人意旨但衆言貪黷尤甚上曰臣下如此言事甚嘉逾月簡罷

實錄記此事但云景德中

按會要則景德四年十二月始增置府界提點一人以武臣充疑繼忠因對言事即此提點刑獄錢帛時也今附見須考或是三年三月末事更詳之

丁酉詔節度使葛霸為并州駐泊都部署時廷臣有隸麾下者頗擾軍民霸昏耄不能察上知之亟召還令霸勿復奏隨除海州朐山東海等縣民所逋去年賑貸

及倚閭東苗鹽米 京畿父老百三十人對於長春殿
賜帛有差先與羣臣同上徽號雖不允其請特有是賜
已亥荆湖北路轉運使言溪洞團練使彭文綰部送澧
朗等州先陷漢口五十人來歸請加恩命賜牌印及許
其歲貢方物詔授文綰檢校官知忠彭州事餘從其請
庚子契丹遣使保靜軍節度使耶律乾寧左衛大將軍
耶律昌主副使宗正卿高正右金吾衛將軍韓檣奉書
禮來賀來年正旦

初有司將以南郊儀仗給郕王出殯王欽若陳其不可
癸卯欽若又言夫名與器不可假人位既不同禮亦異
數故太牢以祭匹士為攘繁纓以朝聖人所惜況法駕
鹵簿本奉至尊郊祀廟享俱為大事安可以羣臣凶禮
參用吉儀既黷尊卑實違典法請令有司依唐六典令
式別置王公以下車輅及鼓吹儀仗以備拜官職朝會
婚葬之用詔從其請

是月趙德明又遣其教練使郝貴來貢

此據會要國史實錄皆無之

詔江淮荆湖南北路轉運司逐年所運上供糧儲自
今如有出剌即與批書轉運使副厯子叙為勞績

欽定四庫全書

續資治通鑑長編卷六十二

宋 李燾 撰

真宗

景德三年正月甲辰朔上不受朝宰臣率文武百官內
職將校契丹使詣闕拜表稱賀舊制諸軍將校與樞密
使以下詣長春殿拜表是歲以戎使在列故悉就文武
班焉

丁未罷近京諸州官市芻藁以農事將興慮擾民也

倚閤京東西淮南水災州軍逋租

己酉詔河南流民至河北者聽請佃荒田

諸陵地形汙下積水始議修塞之壬子命武勝節度使
駙馬都尉吳元扆為監修諸陵澗道都部署內侍左班
副都知閤承翰副馬先遣工部尚書王化基往告既而
從元扆等請禁民開掘近陵地今本鎮增植嘉木其兆
域內民居官廨徙置三百步外三月而畢功又遣使告

三陵及嵩嶽 太常禮院言孟饗太廟准詔用乙卯伏

緣其日鄆王遷殯吉凶異道在禮不得相干請改日詔

改用辛酉

甲寅以契丹屢遣使修好命近臣告諸陵

丁巳遣使詣畿縣發廩賑貧民收瘞四郊遺骸親釋逋
負繫囚六十餘人用郊祀赦恩也上慮有司稽滯故御
便殿躬放之餘令准此

庚申令京西轉運司出倉粟賑貧民又遣詣汝州賑貸

丁卯遣使料簡諸軍樞密都承旨韓崇訓等詣殿前侍衛司供備庫使帶御器械綦政敏等分往京東西諸州詔緣邊歸民給復三年

初仇象先等之削奪也開封府法官實定其罪於是象先等詣登聞訴理詔工部尚書王化基樞密直學士李濬御史中丞呂文仲給事中董儼知雜御史王濟覆視之皆言象先等事雖有失而法不至追官戊辰詔各復舊秩而罪開封府官屬焉

青齊淄維登萊等州民飢已已詔京東轉運司賑之又遣屯田郎中楊覃乘驛與河北轉運司賑澶濱棣德博州飢民

辛未以上部員外郎兼侍御史知雜事王濟比部員外郎孫崇諫權判司農寺崇諫給本官實俸月賜添支錢七千始置常平倉也先是言事者以為水旱災沴有備無患古有常平倉今可復置請于京東西河東陝西江淮兩浙計戶口多少量留上供錢自千貫至二萬貫令

轉運使每州擇清幹官主之專委司農寺總領三司無得輒用每歲夏秋准市估加錢收糴貴則減價出糴俟十年有增羨則以本錢還三司詔三司集議請如所奏而緣邊不增置於是司農官吏創解舍藏籍帳度支別置常平倉案大率萬戶歲餘萬石止於五萬石或三年以上不經糴則回充糧廩別以新粟補之其後又詔災傷州軍糴粟斗勿過百錢詔陝西轉運司視管内乏食處即賑給之

癸酉賜編修君臣事迹官太僕少卿直秘閣錢惟演等
蓀蓉舊制方物之賜止及近臣至是優禮此職故也

是月詔以咱隆族和爾沁博當宗族伊朗等為本族首領
檢校太子賓客皆斯多特之外姻也 五溪都防禦使
向通漢表求追贈父母從之

二月甲戌朔上溪州刺史彭文慶率溪洞蠻六十二人
來朝且獻方物上顧謂文慶曰爾善於統轄益宜盡心
又謂羣蠻曰自今勿復為過犯者不赦各賜錦袍銀帶

有差

初開寶中文武官郎中刺史將軍以上私忌日給假其
後編敕者失不載有司第相緣遵用乙亥始詔羣臣自
今私忌日並給假一日忌前之夕聽還私第 詔京東
西淮南河北賑給客戶乏食者

丙子權三司使丁謂等言唐宇文融置勸農判官檢戶
口田土偽濫等事今欲別置慮益煩擾而諸州長吏職
常勸農乃請少卿監刺史閤門使已上知州者並兼管

內勸農使餘及通判並兼勸農事諸路轉運使副並兼
本路勸農使詔可勸農使入銜自此始 詔節度觀察
防禦團練刺史所領郡在廣南川峽者無得抽取公人
以隸給使

戊寅代州言大石寨得契丹伊實南大王府牒欲自大
石谷至境上深山打圍已命本寨及緣邊巡檢報牒禁
止詔自今本州移文告諭無使諸寨互行報牒慮其不
一故也 詔中書及諸司人吏犯賊叙理在諸司者永

不與外官

己卯謁明德皇后攢宮如二年之儀

庚辰詔諸行尚書文明殿學士資政殿大學士給從人
十人學士丞郎六人給諫舍人五人諸司三品四人於
開封府金吾差借每季代之中書先差金吾從人自今
亦令參用開封府散從官 詔貢舉人因事殿舉及永
不得入科場非被杖者並許復應舉

辛巳命知制誥天長朱巽直史館開封張復取太祖太

宗兩朝史館日歷時政記起居注行狀編次以聞仍令
資政殿大學士王欽若總之詔中書樞密院三司檢兩
朝宣教聖旨文字進內將修國史故也

壬午詔西京留守司諸司人非經考試補正名者不得
叙考出官時特敕補御史臺守闕驅使官李守正為正
名因條約之

癸未武昌縣民間人若拙遣其甥韓寧伐登聞鼓告永
興民李琰結黨三十餘人謀殺官吏據城叛詔度支判

官李應機閣門祇候侍其旭乘傳按問并其黨皆伏誅
琰辭連已所不快者數十人一切不問旭先領東西排
岸司與謝德權提點在京倉草場嘗於倉隙地牧牛羊
為德權所訟上問德權曰牛羊食倉粟邪旭聞而自劾
上勉諭之他日召問旭汝才孰與德權優對曰德權畏
法謹事臣乃敢於官倉牧牛羊是不足也人多稱之

旭左

監門衛上將軍
之子不記邑里

甲申以宋州為應天府

丙戌以唐張九齡九世孫元吉為韶州文學元吉詣闕
獻明皇墨跡及九齡真圖告身故錄之

丁亥樞密使檢校太傅王繼英卒上即臨哭久之賜白
金五千兩謂宰相曰繼英久在左右小心畏謹淹忽淪
逝良可念也贈太尉侍中諡恭懿遣內侍護喪并為葬
其祖父又贈其妻賈氏長樂郡夫人錄其子及諸壻門
人親吏數十人初繼英幼孤寄育外王父諸舅有旅殯
者時方奏遣其子營葬會繼英卒特詔有司給辦

已丑詔河北諸州民陷契丹而歸者舊住莊產勿限編
敕年歲並給之

癸巳詔河西軍營在府州者所給芻糧自今增置渡船
仍舊於保德軍請領如水漲冰合即聽隨處給遣或預
令輦載以往委轉運使專提振之先是河東民常賦及
和市芻糧並輸府州而陟河阻山頗為勞苦尋詔徙屯
河東保德軍其營在府州者聽量留之而芻粟之費並
給於保德軍條約以來公私為便至是上封者言慮水

漲冰結則軍士涉河往來艱阻上志在愛民故特申前
詔 虞部員外郎馮亮為度支員外郎淮南江浙荆湖
制置茶鹽兼都大發運使都大發運使自至道末省之
及是復置

丙申令開封府應制舉人投牒者並待以客禮 資政
殿大學士王欽若上疏請復先蠶之祀詔禮官詳考故
事以聞於是從禮官議每歲春蠶生遣官攝祭於東郊
如先農例

丁酉詔曰比者入內內侍班院分遣使臣於內東門等處勾當署置名目細而甚詳其所掌極有可省去其內東門取索司可併隸內東門司餘入都知司內東門都知司內侍省入內內侍班院併為入內內侍省舊領事務咸隸焉尋又改內侍班院為內侍省詔幕職州縣官有曾任京朝官准赦當叙遷及奏舉當磨勘者流內銓不得就移

契丹既和朝廷無事寇準頗矜其功雖上亦以此待準

極厚王欽若深害之一日會朝準先退上目送準欽若
因進曰陛下敬畏寇準為其有社稷功耶上曰然欽若
曰臣不意陛下出此言澶淵之役陛下不以為恥而謂
準有社稷功何也上愕然曰何故欽若曰城下之盟雖
春秋時小國猶恥之今以萬乘之貴而為澶淵之舉是
盟於城下也其何恥如之上愀然不能答初議親征未
決或以問準準曰直有熱血相潑耳於是譖者謂準無
愛君之心且曰陛下聞博乎博者輸錢欲盡乃罄所有

出之謂之孤注陛下冠準之孤注也斯亦危矣

按宋史冠準本

傳此段亦係

王欽若語

由是上顧準稍衰準在中書喜用寒峻每

御史闕輒取敢言之士他舉措多自任同列忌之嘗除
官同列屢目吏持例簿以進準曰宰相所以器百官若
用例非所謂進賢退不肖也因卻而不視戊戌中書侍
郎兼工部尚書平章事冠準罷為刑部尚書以尚書左
丞參知政事王旦為工部尚書平章事旦入謝便坐上
謂曰冠準以國家爵賞過求虛譽無大臣體罷其重柄

庶保終吉也既而命準出知陝州將行又遣近臣傳旨

戒約

準知陝州在三月庚申今并書之自準士安死準獨相踰五月本傳所言同列豈指王旦馮拯耶王

欽若前已罷政距士安死時又六月矣王繼英陳堯叟實在樞府當考

已亥刑部侍郎參知政事馮拯為兵部侍郎資政殿大學士兵部侍郎王欽若為尚書左丞刑部侍郎簽署樞密院事陳堯叟為兵部侍郎並知樞密院事翰林學士工部員外郎知制誥趙安仁為右諫議大夫參知政事樞密都承旨四方館使韓崇訓東上閣門使馬知節並

簽署樞密院事崇訓為檢校太傅知節檢校太保詔叙班以欽若拯堯叟安仁崇訓知節為次令即日視事

上聞貝州調民修城慮其煩擾詔亟罷之第用州兵以暫給役

是月尚書左丞向敏中等言奉詔與判銓官詳定選集事宜謹案選人至多見在任官一年者向來銓司已注替人或致不成二考未為允當今欲令諸色合該投狀選人今後每至冬季一集候現任官二周年半即得注

替如未有闕曉示各令待闕並許春夏秋冬每一集旋
依次注擬更不使隔季員闕其兩川廣南漳泉等處見
任官並許成資日注替從之 封駁司言中書樞密院
多至午未方送到文字比置此局貴要審詳况諸處文
字皆有常限或及旬日一月以來商量施行若當司畧
不看讀便行發遣乃是發放之司豈曰封駁之職望自今除
急速文字外其餘道數稍多看詳未及者許至次日發遣又
近日多有發文字不由當司欲望非涉機密皆依舊制從之

交趾兵亂黎明提等留廣州不得歸三月甲辰詔別賜錢十五萬米百斛仍並給館券

乙巳命兵部員外郎直史館任中正為契丹國母生辰使西上閣門使獎州刺史李繼昌副之朝廷每遣使持禮輒以襲衣金帶器械茶藥賜王繼忠繼忠對使者必泣韓國華之還也又奉表懇請致書國主名已歸上以盟誓之約各無所求因中正等行賜繼忠手詔諭意且言國主若自許卿歸則當重幣為謝然契丹主遇繼忠

厚亦弗許也

丁未以樞密直學士李濬權知開封府劉綜同勾當三班院濬吏幹勤敏能檢察隱微京師稱之綜建議三院御史員數至少每奉朝請劾制獄多以他官承乏甚紊彛制望詔兩制已上各舉材堪御史者充三院共置十員若出使按獄所經州郡官吏能否生民利病刑獄枉濫悉得察舉

辛亥免隨州先化縣民貸糧二千石已納者復給之

甲寅元德皇太后忌知樞密院王欽若言舊制大忌樞密使依內諸司例唯進名不赴行香有虧恭恪自今欲與中書門下同赴佛寺從之自是三司使副翰林樞密龍圖等學士並赴焉

己未太常丞直集賢院任隨上言曰

任隨未見

臣聞立國之

本在乎得士得士之要在乎見情故仲尼以為人情者聖王之田治道所由生也是則時之否泰事之損益萬化所繫必因人情明天下之情者莫智於聖人成聖人

之德者實由於良輔故漢書曰明主不惡切諫以博觀
忠臣不避重誅以直諫者所以達下情而求治致君道
於無窮也為臣有五諫之名前代有七人之列陛下祇
嗣寶圖秉持金鑑可封之俗既阜成矣無疆之化亦馴
致矣尚聞焦勞庶政昧旦以視朝歷覽羣書乙夜而忘
寐仍下賢良之詔旁求亮直之臣惟稽古之聖心軼前
王之令典雖求諫之路已見於洞開而掌諫之臣未聞
乎公舉今諫議大夫司諫正言雖有數員但充位尸祿

而已是致堯鼓雖設寂寥而無聲杜解縱陳謬謬而何
効箱篋謾藏於諫紙摺紳竟寢於正詞罕遵及雷之風
莫覩引裾之直願陛下擇賢士黜其臣懸賞罰之文立
懲勸之道其兩省諫官並准有唐故事定其員數優其
俸給限以遷官之年月責以供職之否臧其或獻替推
誠彌縫勵節言事有裨於時政抗章不避於天誅進思
盡忠有犯無隱則請行甄擢以勸衆焉其或尸利無慙
弼違有闕務引腹誹之咎多置面從之諛不啓心而沃

心固危言而危行則請行降黜以勵衆焉夫如是則賢者勸惰者激庸者退懦者立俾朝廷之士咸願竭忠而報國矣上覽而嘉之乃降詔曰國家設諫諍之官廣詢求之路蓋欲彌縫闕漏啓迪聰明而處職者姑務因循罕聞謬誤茲為尸祿曷副虛懷自今宜竭節箴規悉心獻替賞罰之典斷在必行

乙丑免昇州江寧縣柴荻務所欠咸平四年已前租課錢物二十八萬

先是羣臣詔葬公私所費無定式龍圖閣待制判鴻臚寺
戚綸疏言其事丙寅命翰林學士晁迥知制誥朱巽官
死使劉承珪及綸校品秩之差定為制度施行之令
諸路州軍不得差都監監押錄囚時環州都監田濬言
地居極邊甫近蕃境而推勘院牒請覆刑獄慮緩急有
警本職妨闕故條約之

戊辰免簡州居民造舍所輸竹木稅錢每歲四百三十
餘貫

己巳太常寺言神州壇壝中有阬塹及車馬之迹又兩壝步數迫隘不合禮文望令改擇壇位及依令式封標諸壇外壝禁人耕墾樵牧奏可即壇於方丘之西焉

是月始命朝臣提點開封府界諸縣鎮公事其後又增

置一員以閤門祗候充

初置府界提點會要在景德三年增置在四年十二月而實錄

並無之本志亦甚略今且附見更俟詳考實錄二年十二月嘗記命高繼忠等提點府界刑獄錢帛疑此即置

官事始也當考

夏四月癸酉詔河北諸州軍市征摧酤比常課不及者

時展限三月

乙亥詔川峽官丁父母憂者除州軍長吏奏裁餘並許解官

丙子幸崇文院觀四庫圖籍及所修君臣事迹徧閱門類詢其次序王欽若楊億悉以條對有倫理未當者立命改之謂侍臣曰朕此書蓋欲著歷代事實為將來典法使開卷者動有資益也賜編修官金帛有差

端拱中定州民劉知友為從弟志元所殺知友二子曰

斌曰四哥年皆幼隨母改適人母常謂曰爾長必報父
仇後志元遇赦還時斌母已死兄弟挾刃刺志元於道
不殊即詣吏自陳州具獄上請丁丑詔志元黥面配隸
汝州釋斌等罪

實錄云劉斌免黥面配本州牢
城四哥釋之今從國史劉斌傳

已卯以齊州章丘縣為清平軍淄州高苑縣為宣化軍
乙酉置河北緣邊安撫使副使都監於雄州命雄州團
練使何承矩西上閤門使李允則推易副使楊保用為
之並兼提點諸州軍擁場初禁擁場通異物而邏者得

所易珉玉帶及婦人首飾等物允則曰此以我無用易彼有用也縱之保州刺史董紹重卒命其子霸襲知

州事

丙戌錄故京西轉運使工部郎中康戩子希齡為奉禮郎給俸終喪戩異國人數上章言事以竭誠自任故優其禮秩非常制也遣樞密直學士劉綜西上閤門使李允則詣三司工部侍郎董儼龍圖閣待制戚綸宮苑使劉承珪詣開封府知制誥朱巽龍圖閣待制陳彭年

東上閤門使曹利用詣御史臺殿前侍衛司編叙繫囚
翌日上御崇政殿臨決殺人者論如律雜犯死流徒降
一等杖以下釋之日旰既罷復令軍頭引見司官奏所
決刑名審視訖乃施行是後每歲暑月上必親臨慮問
率以為常御史臺引都官員外郎竇譔者前知長安縣
頗恣苛虐詔劾其罪上曰親民之官不循理道酷用刑
罰宜擯棄也遂令分司西京

辛卯放榷場部羊使臣主典欠折羊十萬三千六百餘

斤

壬辰命使六人巡撫益利梓夔福建等路所至存問犒
設官吏將校父老疏決繫囚除雜犯至死官典犯賊依
法外流已下遞減之仍案察官吏能否民間利害以聞
時屯田員外郎謝濤使益利路及還舉所部官三十餘
人宰相以為多濤乃歷陳其治狀且願連坐奉使舉吏

連坐自濤始

濤本傳云火星見西南故命濤出使當時所遣使并及福建江浙恐不緣火星見西

南也今不取

乙未復詔羣臣轉對其在外京朝內殿崇班已上候得

替先具民間利害實封於閣門上進方得朝見

咸平三年十一月

月壬午初令常參官轉對如故事未見罷免時月今復令轉對所未詳也五年十月末田錫疏可考

右

諫議大夫种放有兄喪賜告歸終南宴於龍圖閣上作詩賜放侍臣皆賦放每至京師秦雍學徒多就而受業上面獎之放頓首謝

己亥命使六人巡撫江浙路度支郎中裴莊使兩浙及還奏能吏二十人慢官五人多所升黜 申嚴私藏天

文兵法之禁星筭術數人所在悉部送赴闕

故彰德節度使王饒孫惟德不肖不能自立寓居西洛
乞食以自給上聞而憫之庚子命惟德為汝州司士參

軍